



Pranim / Dorezuar Punëna/Pradalo Received/Delivered	06	10	2022	2	viti god year
Organ /Njesia Organ /Jedinita Org./Unit	Hi Prot Hi Prot Prot No	Shtojca Prilog Appendix	Sasia Kolicina Quantity		
SKINSHEK	5944/2022		1/4		



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.725/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave i përbërë nga: Malsore Gashi Bajraktari -kryetare, Arben Mehmeti dhe Ardita Haxhnikaj Demi -anëtarë, me Zyle Millaku Gojnovci-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën me numër A.nr.725/2022 të datës 23.08.2022, të parashtruar nga ankuesi me vendbanim

kundër organit të punësimit Komuna e Lipjanit, në çështjen juridike "kërkesë nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Rregullat dhe Procedurat e Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 06.10.2022, mori këtë:

V E N D I M

REFUZOHET si e pabazuar ankesa me numër A.nr.725/2022 e datës 24.08.2022, e parashtruar nga ankues

A r s y e t i m

Ankuesi i punësuar në Komunë të Lipjanit, më datë 23.08.2022 ka parashtruar ankesë me numër protokolli 4877/2022 në Këshillin e Pavarur Mbikëqyrës për Shërbim Civil të Kosovës, për njohje të së drejtës për kompensimin e shtesave të TI-së në bazë të Vendimit Nr.02/39 të datës 08.10.2008 të Qeverisë së Republikës së Kosovës.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbim Civil të Kosovës, më datë 26.08.2022 ka proceduar kërkesën për përgjigje në ankesë në Komunë të Lipjanit, ndërsa Komuna e Lipjanit me datë 02.09.2022 ka përcjell përgjigjen në ankesë përmes formës elektronike, së bashku me shkresat e bashkëngjitura të lëndës prej 1/22 faqe.

Kolegji për Shqyrtimin dhe Vendosjen e Ankesave për vendosje meritore ka administruar këto prova: Ankesën me numër të protokollit 4877/2022 të datës 23.08.2022 të parashtruar nga ankuesi

në Këshillin e Pavarur Mbikëqyrës për Shërbim Civil të Kosovës; Vendimi Nr.02/39 të datës 08.10.2008 të Qeverisë së Republikës së Kosovës, bashkangjitur Aneksi 1, lista dhe titujt e punonjësve që do të jenë përfitues të masave stimuluese duke përfshirë edhe shumë për këto pozita; Akt emërimi nr.01-101/03-41321 i datës 03.08.2022; Kërkesën me numër 01-120/01-11212 të datës 01.03.2022 për aprovim të shtesës nga ankuesi drejtuar Njesisë së personelit në Komunë të Lipjanit; Konfirmimi i datës 03.08.2022 me nr. protokoll 1-400/01-41325 për mjete financiare të mjaftueshme nga Njësia e personelit dërguar; Certifikatë e datës 02.03.2010 lëshuar nga CISCO; Certifikatë e datës 028.10.2018 lëshuar nga Microsoft partner; Certifikatë e datës 12.11.2012 lëshuar nga Cactus; Përgjigjen në ankesë e datës 02.09.2022 përmes formës elektronike; Formulari i të dhënave për listë pagave e datës 01.06.2022 për ankuesin; Vendimi i datës 21.02.2022 me numër protokoll 112-9533 për transferimin në vendin e punës për ankuesin; Certifikatë e datës 02.11.2008 lëshuar nga AMS; Diplomë e kursit e datës 07.06.2003 lëshuar nga Youth Center Lipjan; Përgjigje nga Njësia e personelit sipas kërkesës së KPMSHCK-së.

Kolegji për Shqyrtimin dhe Vendosjen e Ankesave pasi ka shqyrtuar shkresat e lëndës të parashtruara nga palët në procedurë, konstatoi se ankesa e ankuesit është e pazuar, SEPSE:

Nga administrimi i shkresave të lëndës respektivisht sipas Vendimit me numër protokoll 112-9533 të datës 21.02.2022 të Kryetarit të Komunës të Lipjanit, për shkak të ristrukturimit të Administratës Komunale ankuesi është transferuar në pozitën „Zyrtar për Teknologji informative“ në Kabinetin e Kryetarit të Komunës së Lipjanit nga data 21.02.2022. Ankuesi pas transferimit të tij me datën 01.03.2022 ka parashtruar kërkesë tek Udhëheqësja e Burimeve Njerëzore në Komunë të Lipjanit përmes Kryetarit të Komunës së Lipjanit, që ti bëhet aprovimi i shtesës së TI-së sipas Vendimit nr.02/39 të datës 08.10.2008 të Qeverisë së Kosovës, në vlerë prej 300.00 euro.

Udhëheqësja e Burimeve Njerëzore në Komunën e Lipjanit me datë 03.08.2022 me shkresë zyrtare me nr. protokoll 1-400/01-41325 i drejtohet Udhëheqësit të Divizionit të Pagave, me të cilën shkresë ka konfirmuar mjetet buxhetore të mjaftueshme, për shtesën e TI-së për zyrtarin konform Vendimit nr.02/39 të datës 08.10.2008 të Qeverisë së Kosovës, mirëpo deklarimit në ankesë të datës 23.08.2022 ankuesit ende nuk i janë ekzekutuar shtesat në pagën bazë.

Ankuesi me date 23.08.2022 parashtron ankesë në Këshillin e Pavarur Mbikëqyrës për Shërbimin Civil, me kërkesë për njohën e së drejtës për kompensimin e shtesave të TI-së, në bazë të Vendimit Nr.02/39 të datës 08.10.2008 të Qeverisë së Republikës së Kosovës, duke pretenduar që ti bëhet pagesa në vlerë prej 300.00 euro, si në pikën I të këtij vendimi, në mënyrë retroaktive nga data 21.02.2022 data e fillimit të marrëdhënies së punës.

Kolegji për shqyrtimin dhe vendosje e ankesave, gjatë shqyrtimit të ligjshmërisë së pretendimeve ankimore të ankuesit, ka analizuar Vendimin Nr.02/39 të datës 08.10.2008 të Qeverisë së Republikës së Kosovës, përmes të cilit është aprovuar lista e pozitave dhe shtesave në pagë për kategori të veçanta të profesioneve deficitare në fushën e teknologjisë informativë dhe inxhinieringut, dhe Vendimin Nr.07/29 të datës 31.07.2008 të Qeverisë së Republikës së Kosovës, me të cilin është përcaktuar procedura për parashtrimin dhe trajtimin e kërkesave dhe mënyra e realizimit të shtesave për kategoritë e veçanta të profesioneve deficitare, dhe mbi këtë bazë është konstatuar se aprovimi i shtesave në pagë për pozita deficitare është bërë me qëllim të ruajtjes së kategorive të veçanta deficitare të punonjësve, stimulimit të konkurrimit për profesione të veçanta

deficitare dhe zbatimit të parimit të pagesës së njëjtë për punë të njëjtë në të gjitha organizatat buxhetore. Po ashtu, me këtë vendim është përcaktuar se paga bazë së bashku me shtesat mbi pagë nuk mund të tejkalojnë pagën e zyrtarëve të lartë të emëruar nga KELP-i, si dhe është obliguar Ministria përgjegjëse për Administratë Publike dhe Ministria e Financave për shqyrtimin e listës dhe standardëve kualifikuese dhe shumës stimuluese për postet e caktuara, së paku një herë në gjashtë muaj.

Kuvendi i Republikës së Kosovës, me datë 13.05.2010 ka aprovuar Ligji Nr.03/L-147 për Pagat e Nëpunësve Civil, përmes të cilit është bërë përcaktimi i sistemit dhe strukturës së pagave, shtesave dhe kompensimeve të tjera për nëpunësit civilë, ndërsa me dispozitat e nenit 14 të këtij ligji është përcaktuar se: 1. *Shtesat mbi pagën bazë janë: 1.1. shtesa për punë me ndërrime dhe jashtë orarit të punës; 1.2. shtesa për kushte specifike pune; dhe 1.3. shtesa për kushtet e tregut.* Përkritazi me këtë, duke u bazuar në dispozitat e nenit 27 të Ligjit Nr.03/L-147 për Pagat e Nëpunësve Civil, Qeveria e Republikës së Kosovës, me datë 24.12.2012 ka aprovuar Rregulloren Nr.33/2012 për Shtesat në Pagë dhe Kompensime të Tjera të Nëpunësve Civil, përmes të cilës ka përcaktuar kushtet dhe procedurat për shtesat dhe kompensime të tjera mbi pagën bazë të nëpunësve civilë. Me hyrjen në fuqi të kësaj rregullore janë shfuqizuar të gjitha aktet nënligjore të cilat kanë rregulluar shtesat dhe kompensimet tjera të nëpunësve civil, dhe rrjedhimisht edhe Vendimi Nr.02/39 i datës 08.10.2008 të Qeverisë së Republikës së Kosovës, konstatim ky i dhënë edhe në Raportin Vjetor të Vitit 2017 të Këshillit të Pavarur Mbikëqyrës për Shërbimin Civil të Kosovës, kështu që mbi këtë bazë, Kolegji vlerëson se pretendimi ankimor i ankuesit për realizimin e shtesës në pagë sipas Vendimit Nr.02/39 të datës 08.10.2008 të Qeverisë së Republikës së Kosovës, është i pa bazuar.

Kolegji për Shqyrtimin dhe Vendosjen e ankesave bazuar në dispozitat e Rregullosës Nr.33/2012 për Shtesat në Pagë dhe Kompensime të Tjera të Nëpunësve Civil, përkatësisht nenin 8 të kësaj rregullore, ka konstatuar se Ministria përgjegjëse për administratë publike, në bashkëpunim me ministrinë përgjegjëse për financa, mund të kërkojë nga Qeveria që të miratojë një shtesë për kushtet e tregut për pozitat ose llojet e pozitave për të cilat niveli i pagës për personelin e ngjashëm nga organizatat dhe punëdhënësit e tjerë jashtë Shërbimit Civil është së paku 40% më i lartë sesa niveli i pagës që ofrohet nga Shërbimi Civil, e kjo shkakton vështirësi të konsiderueshme në rekrutimin dhe mbajtjen e personelit të kualifikuar për ato pozita ose lloje të pozitave në administratë publike, ndërsa institucioni për realizimin e shtesës për kushtet të veçanta të tregut duhet t'i ofrojë Ministrisë përgjegjëse për administratë publike kërkesën lidhur me arsyeshmërinë e realizimit të shtesës dhe një analizë që dëshmon vështirësitë të cilat janë hasur nga institucioni gjatë rekrutimit dhe mbajtjes së personit të kualifikuar, listën e pozitave përkatëse dhe koston vjetore të vlerësimit financiar. Shtesa mbi pagën bazë për kushte të veçanta të tregut nuk mund të tejkalojë më shumë se 50% të pagës bazë.

Kështu që pas analizimit dhe vlerësimit të të gjitha shkresave të lëndës si dhe duke u bazuar në nenin 132 paragrafi 2 të Ligjit Nr.05/L-031 për Procedurën e Përgjithshme Administrative, nenin 6 paragrafi 1 nën paragrafi 1.1 dhe nenin 18 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji për Shqyrtimin dhe Vendosjen e Ankesave, vendosi si në dispozitiv të këtij vendimi.



Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.725/2022

Zyle Millaku Gojnovci

Procesmbajtëse

Malsore GASHI BAJRAKTARI

Kryetare e Kolegjit

Vendimi i dorëzohet:

- Ankuesi
- Kryetarit të Komunës së Lipjanit;
- Udhëheqësit të Personelit në Komunë të Lipjanit dhe
- Arkivit të KPMSHCK-së.